



**Sumáriu Kazu**  
**Tribunál Judisiál Primeira Instánsia Dili**  
**Mai 2024**

**Afirmasaun:** Sumáriu Kazu tuir mai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

**JSMP** kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

**A. Sumáriu prosesu julgamentu kazu iha Tribunál Judisiál Primeira Instánsia Dili**

**1. Totál kazu ne'ebé JSMP monitoriza : 16\***

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 no 36 Lei Kontra Violénsia Doméstika (LKVD)	Ofensa ba integridade física simples ho natureza Violénsia Doméstika (VD) no tipu ilísitu sira kona-ba violénsia doméstika	6
Artigu 172 KP	Violasaun seksuál	1
Artigu 177 KP	Abuzu seksuál ba menór	1

\* Totál kazu 16 ne'e la representa totál kazu ne'ebé Tribunál Judisiál Primeira Instánsia Dili julga iha fulan Maiu 2024

Artigu 145 KP	Ofensa ba integridade física simples	1
Artigu 140 KP	Omísidiu negligente	1
Artigu 294	Korrupsaun ativa	1
Artigu 211	Arma proibida	1
Artigu 139	Omísidiu agravadu	1
Artigu 23 KP no artigu 172 KP	Tentativa violasaun seksuál	1
183 KP	Devasa	1
Artigu 1757, 1758, 1759, 1762, 1765, 1786, 1782, 1804, 1805 KS	Ezersísiu poder paternál	1
<b>Totál</b>		<b>16</b>

## 2. Totál desizaun ne'ebé JSMP monitoriza:8

Tipu pena	Artigu	Númeru
Pena prizaun no indemnizasaun sivíl	Artigu 66 KP no artigu 69 (a) KP	2
Multa	Artigu 67 KP	3
Suspensaun ba prizaun nia ezekusaun	Artigu 68 KP	2
Omologa pedidu dezisténsia keixa	Artigu 262 KPP	1
<b>Totál</b>		<b>8</b>

## 3. Totál kazu sira ne'ebé adia tuir JSMP nia monitorizasaun: 0

## 4. Totál kazu sira ne'ebé kontinua prosesu tuir JSMP nia monitorizasaun:

## **B. Deskrisaun sumáriu ba desizaun kazu sira**

### **1. Krime ameasa**

Nú. Prosesu : 0160/23/PDDIL  
Kompozisaun Tribunál : Singulár  
Juis : Dr. José Maria de Araújo  
Prokuradór : Dr. Rainato Bere Nahak  
Defeza : Dr. José da Silva  
Desizaun : Pena Multa US\$60.00

Iha 17 Maiu 2024, Tribunál Judisiál Primeira Instánsia Dili prezide julgamentu leitura sentensa ba krime ameasa ne'ebé envolve arguidu JNdJ hasoru lezadu ZdA, iha Munisípiu Dili.

#### **Akuzasaun Prokuradór**

Prokuradór akuza katak iha 20 Abril 2023, iha oras tuku 15:00 lokraik, lezadu aparú hela belimbi sanak halo belimbi nia sanak no tahan monu ba rai, nune'e arguidu dehan ba lezadu atu soe belimbi tahan sira no lezadu mós halibur belimbi sanak ho nia tahan sira ne'e tau ba iha kintál. Depoizde soe tiha belimbi nia tahan no sanak lezadu dehan ba arguidu nune'e "*nusa mak arguidu sempre hase hela deit lezadu bainhira lezadu hala'o hela serbisu*", rona tiha lezadu koa'lia nune'e arguidu komesa trata at lezadu hodi hateten katak "*ó ema lao rai, milisia ó mangame hau tesi tiha ó*", no ho ameasa hodi dehan tan "*labele mangame se la'e hau tesi kotu tiha ó tanba komarka la sulan animal maibé sulan ema*".

Prokuradór akuza arguidu kontra artigu 157 KP kona-ba ameasa ho moldura penal to'o tinan 2 ka multa.

#### **Produsaun ba prova sira**

Iha prosesu julgamentu, arguidu konfesa parsialmente ba faktu iha akuzasaun no deklara katak antes ne'e sira iha ona problema kona-ba rai. Arguidu la ameasa lezadu tanba iha momentu akontesimentu arguidu foin mak fila hosi serbisu fatin no haree hela lezadu ho arguidu nia fetu foun deskute malu hela kona-ba belimbi tahan ne'ebé monu iha sira nia kintal.

Entretantu lezadu kontinua konfirma faktu iha akuzasaun no deklara katak antes agresaun ne'e sira iha ona problema tanba rai, lezadu ho arguidu mós hanesan maun alin haki'ak, tanba arguidu nia aman mak haki'ak lezadu no antes ne'e sira iha ona problema tanba rai baliza. Hosi liafuan amesa ne'e halo lezadu sente ta'uk kuandu hasoru malu ho arguidu.

Testemuña NdOR nu'udar lezadu nia oan informa katak, lezadu aparú belimbi halo belimbi nia tahan tama ba arguidu nia kintal nune'e arguidu nia fetu foun hirus hodi dehan, ami hanesan imi nia atan ne'ebé ami mak hili fali ai-tahan, arguidu ne'ebé foin

fila hosi serbisu hakilar dehan milisi pndatang “ó mangame hau tesi tiha ó komarka ne’e laos sulan animal”.

### **Alegasaun finál**

Prokuradór konsidera arguidu provadu komete krime hasoru lezadu, hosi liafaun ameasa ne’ebé arguidu dehan ba lezadu halo nia sente ta’uk kuandu hasoru malu ho arguidu. Tanba ne’e husu ba tribunál atu kondena arguidu ho pena prizaun supende ninia ezekusaun.

Entretantu, defeza husu ba tribunál atu absolve arguidu hosi krime ne’e, tanba depois akontesimentu ne’e arguidu ho lezadu la iha ona problema.

### **Desizaun**

Depoisde avalia faktu sira ne’ebé prodús iha julgamentu, tribunál prova katak arguidu ameasa duni lezadu halo lezadu sente ta’uk ho arguidu nia liafuan ameasa ne’e.

Bazeia ba faktu provadu sira ne’e no tetu mós ho sirkunstánsia atenuante sira ne’ebé haleu krime ne’e, nune’e tribunál konklui prosesu ne’e no kondena arguidu ho pena prizaun fulan neen suspende ba tinan ida.

## **2. Krime ofensa ba integridade fízika simples ho natureza VD**

Nú. Prosesu	: 0205/23.PCCIC
Kompozisaun Tribunál	: Singulár
Juis	: Dr. José Gonsalves
Prokuradór	: Dr. Pedro Batista
Defeza	: Dr. José da Silva
Desizaun	: Pena multa US\$80.00

Iha 23 Maiu 2024, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza VD ne’ebé envolve arguidu MdS hasoru nia feen, iha Munisípiu Dili.

### **Akuzasaun Prokuradór**

Prokuradór akuza katak iha loron no fulan ne’ebé la apura maibé iha tinan 2023, iha oras tuku 22:00 kalan, arguidu tuku dala rua iha lezada nia kanuruk, antes agresaun ne’e, lezada sai hosi serbisu fatin ho kondisaun kolen haree sira nia oan na’in rua seidauk haris, nune’e lezada komesa hirus arguidu ne’ebé sai hela deit la haree labarik sira, nune’e arguidu ho lezada diskute malu no mosu agresaun ne’e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to’o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa integralmente ba faktu sira iha akuzasaun no deklara katak arrepende ninia hahalok, di'ak malu ona ho lezada, foin permiravés mai hatan iha tribunál no depoisde akontesimentu ne'e arguidu husu ona deskulpa ba lezada.

Entretantu lezada kontinua konfirma faktu sira iha akuzasaun no deklara mós katak arguidu nia agresaun ne'e halo lezada sente moras no konsege ba konsulta iha Sentru Saúde Comoro no liu tiha lora tolu mak lezada foin sente di'ak. Arguidu mós husu ona deskulpa ba lezada no fó sala ba lezada lipa ida.

### **Alegasaun finál**

Prokuradór konsidera arguidu provadu komete krime hasoru lezada bazea ba konfisaun arguidu nian no konfirmasaun hosi lezada ba faktu sira, arguidu arrepende ninia hahalok, di'ak malu ona ho lezada no fó sala ba lezada lipa ida, nune'e atu halo prevensaun iha futuru, husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza konkorda ho pedidiu hosi Prokuradór nian atu kondena arguidu ho pena prizaun suspende ninia ezekusaun.

### **Desizaun**

Depoisde avalia faktu sira ne'ebé prodús iha julgamentu, tribunál prova katak arguidu tuku dala rua iha lezada nia kanuruk, ne'ebé rezulta lezada hetan moras no ba halo tratamentu iha Sentru Saúde Comoro hemu ai-moruk liu lora tolu foin rekopera.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok di'ak malu ona no arguidu fó salah ba lezada lipa ida, nune'e tribunál konklui prosesu ne'e no kondena arguidu ho pena multa US\$80.00 ne'ebé arguidu sei selu US\$1.00 kada lora durante lora 40. Tribunál mós fiksa pena alternativa durante fulan tolu prizaun, bainhira arguidu la kumpri pena multa refere.

### **3. Krime ofensa ba integridade fízika simples**

Nú. Prosesu : 0029/22.ERRLK

Kompozisaun Tribunál : Singulár

Juis : Dr. José Gonçalves

Prokuradór : Dr. Simao Brites Seixas

Defeza : Dr. Ganini Daos (Defensór estajiádu)

Desizaun : Pena prizaun fulan 6 suspende ba tinan 1

Iha 23 Maiu 2024, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ne'ebé envolve arguida BdJ hasoru lezada AV, iha Munisípiu Ermera.

### **Akuzasaun Prokuradór**

Prokuradór akuza katak iha 6 Abril 2022, lezada ba iha to'os laran hodi fila rai hodi halo kantadeiru atu kari modo musan, bainhira lezada serbisu hela arguida ba tan lezada iha to'os hasai liafuan mal hasoru lezada no arguida kontinua lori ai-matak tuda lezada no kona iha lezada nia knoosen parte loos kona mós iha lezada nia reen-toos no matan laran, arguida nia agresau ne'e rezulta lezada nia knoosen hetan moras no reen-toos hetan suku pontu tolu.

Prokuradór akuza arguida kontra artigu 145 KP kona-ba ofensa ba integridade física simples ho moldura penál to'o tinan 3 ka multa.

### **Produsaun ba prova sira**

Iha prosesu julgamentu, arguida konfesa integralmente ba faktu sira iha akuzasaun no deklarata katak arrepende ninia hahalok no foin primeiravés mai hatan iha tribunál. Arguida mós deklarata katak antes ne'e arguida mak fila uluk kantadeiru ne'e, maibé ikus lezada mak ba okupa fali to'os ne'e.

Etretantu lezada kontinua konfrima faktu iha akuzasaun no deklarata katak agresau arguida nian ne'e halo lezada sente moras no lezada nia reen-toos hetan suku pontu tolu. Depoisde akontesimentu ne'e to'o agora arguida la buka tuir lezada atu husu deskulpa.

### **Alegasaun finál**

Prokuradór konsidera arguida provadu komete krime hasoru lezada bazeia ba konfisaun arguida nian no konfirmasaun hosi lezada ba faktu sira, nune'e husu ba tribunál atu kondena arguida ho pena prizaun suspende ninia ezekusaun.

Entretantu, defeza husu ba tribunál atu fó pena admoestasaun ba arguida ho konsiderasaun katak arguida konfesa, arrepende ninia hahalok no foin primeiravés mai hatan iha tribunál.

### **Desizaun**

Depoisde avalia faktu sira tribunál prova katak arguida lori ai-matak tuda lezada no kona iha lezada nia knoosen parte loos kona mós iha lezada nia reen-toos no matan laran, arguida nia agresau ne'e rezulta lezada nia knoosen hetan moras no reen-toos hetan suku pontu tolu.

Bazeia ba faktu provadu sira ne'e no tetu mós ho sirkunstánsia atenuante sira hanesan arguida konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguida ho pena prizaun fulan neen no suspende ba tinan ida.

## **4. Krime ofensa ba integridade física simples ho natureza VD**

Nú. Prosesu : 0629/22.DICMR  
Kompozisaun Tribunál : Singulár

Juisa : Dra. Albertina Neves  
Prokuradora : Dra. Ivonia maria Guterres  
Defeza : Dr. Ganini Daos (Defensór Públiku Estajiádu)  
Desizaun : Pena multa US\$60.00

Iha 17 Maiu 2024, Tribunál Judisiál Primeira Instánsia Dili prezide leitura sentensa ba krime ofensa ba integridade fízika simples ho natureza VD ne'ebé envolve arguidu LPL hasoru nia feen, iha Munisípiu Dili.

### **Akuzasaun Prokuradora**

Prokuradora akuza katak iha 23 Dezembru 2022, iha oras tuku 10:00 dadeer, arguidu riba no rasta lezada soe ba simente leten, arguidu kontinua silu lezada nia isin ba kotuk, rakut lezada nia fuuk soe ba rai hafoin basa dala ida iha lezada nia matan parte loos, arguidu nia agresaun ne'e halo lezada oin halai. Iha momentu akontesimentu ne'e lezada foin partu halo semana tolu. Antes agresaun ne'e, lezada ho arguidu ba loja elektronik to'o iha loja oin lezada foto iha odamatan tama ne'e, arguidu tama uluk no taka tiha odamatan loja nian, nune'e arguidu ho lezada diskute malu to'o mosu agresaun ne'e.

Prokuradora akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

### **Produsaun ba prova sira**

Iha prosesu julgamentu, arguidu konfesa parsialmente ba faktu iha akuzasaun no deklara katak loos duni lezada hasai foto iha loja oin, arguidu taka duni odamatan no baku deit lezada, maibé la riba lezada ba iha semente leten, arguidu mós deklara katak haku'ak metin lezada atu nune'e lezada labele halai sai ba liur no estraga sasan iha loja. Arguidu deklara mós katak arrepende ninia hahalok, foin permeiravés mai hatan iha tribunál, di'ak malu ona no nafatin moris hamutuk hanesan feen ho laen.

Etretantu, lezada kontinua konfirma faktu hotu iha akuzasaun no deklara katak, arguidu ho lezada ba loja atu hasoru malu ho arguidu nia amante (*selingkuh*), to'o iha loja arguidu halo fali agresaun hasoru lezada hanesan faktu iha akzusaun, lezada informa hosi agresaun ne'e halo nia matan ho tilun mak moras no liman bubu to'o metan. Depois akontesimentu ne'e liu fulan rua mak foin sira di'ak malu arguidu mak ba buka lezada hodi husu deskulpa.

### **Alegasaun finál**

Prokuradora konsidera arguidu provadu komete krime hasoru lezada, arguidu no lezada mós nafatin moris hamutuk hanesan feen ho la'en, nune'e atu halo prevensaun iha futuru, husu ba tibunál atu kondena arguidu ho pena prizaun fulan neen suspende ba tinan rua.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu arrepende nia hahalok, foin primeiravés mai hatan iha tribunál no di'ak malu ona ho lezada no moris hamutuk nafatin hanesan feen ho la'en to'o agora.

### **Desizaun**

Depoisde avalia faktu sira ne'ebé prodús iha julgamentu, tribunál prova katak arguidu riba no rasta lezada soe ba simente leten, arguidu kontinua silu lezada nia isin ba kotuk, rakut lezada nia fuuk no soe lezada ba rai hafoin basa dala ida iha lezada nia matan parte loos, agresoun ne'ebe arguidu halo ne'e halo lezada oin halai.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu arrepende ninia hahalok, foin primeiravés mai hatan iha tribunál no di'ak malu ona ho lezada no moris hamutuk nafatin hanesan feen ho la'en to'o agora, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$1.00 kada loron durante loron 60. Tribunál mós fiksa pena alternativa durante fulan rua prizaun, bainhira arguidu la kumpri pena multa refere.

### **5. Krime violasaun seksuál**

Nú. Prosesu	: 0101/21.LIBZT
Kompozisaun Tribunál	: Kolektivu
Juis	: Dra. Ana Paula Fonseca, Dra. Ersilia De Jesus no Dr. José Maria de Araújo
Prokuradora	: Dra. Benvinda do Rosario
Defeza	: Dr. Ganini Daos (Defensór Públiku Estajiádu)
Desizaun	: Pena prizaun tinan 8 no indemnizasaun sivil

Iha 10 Maiu 2024, Tribunál Judisiál Primeira Instánsia Dili prezide leitura akordaun ba krime violasaun seksuál ne'ebé envolve arguidu JR hasoru lezada ho idade tinan 16, iha Munisípiu Ermera.

### **Akuzasaun Prokuradora**

Prokuradora akuza katak iha 6 Agosto 2021, iha oras tuku 12:00 meiodia, lezada fila hosi eskolah atu ba uma iha dalan klaran arguidu mosu hosi kotuk haku'ak metin tiha lezada, hafoin arguidu uza nia kamiza hodi kesi metin lezada nia ibun no rasta lezada tama ba ai-laran fuik ida, bainhira tama ba iha ai-laran fuik ne'e arguidu komesa kolu lezada nia roupa no latan lezada ba rai no arguidu mós hasai nia roupa hodi halo relasaun seksuál ho lezada no rezulta lezada to'o desmaia.

Testemuña LB nu'udar siguransa bairo haree hetan arguidu nia aktu ne'ebé halo hasoru lezada no testemuña mós informa katak konsekunsia hosi arguidu nia aktu ne'e



lezada gravida fulan haat. Depoizde akontesimentu ne'e arguidu ho nia familia atu ba rezolve maibe la konsege rezolve.

Prokuradora akuza arguidu kontra artigu 172 KP kona-ba violasaun seksuál ho moldura penál tinan 5 to'o 15.

### **Produsaun ba prova sira**

Iha prosesu julgamentu, arguidu konfesa parsialmente ba faktu sira iha akuzasaun no deklarata katak, arguidu ho lezada telefone malu liuhosi telefone de'it no sira konsege kuñese malu no iha relasaun namora fulan ida ona. Arguidu mos deklarata katak relasaun seksuál ne'ebé sira halo ne'e laos iha ai-laran, maibe iha uma mamuk arguidu la kolu lezada nia rupa, maibe lezada rasik mak hasai nia rupa hafoin sira halo relasaun seksuál no depoizde akontesimentu ne'e iha 7 Setembru 2021, familia rua arguidu ho lezada nia buka malu atu rezolve problema ne'e, maibe la konsege rezolve tanba iha asuntu familia.

Entretantu, lezada kontinua konfirma faktu iha akuzasaun no deklarata katak arguidu ho lezada la iha relasaun namora lezada kuñese arguidu iha festa bainhira sira dansa, iha kaontesimentu ne'e lezada fila hosi eskolah iha dalan klaran derpenti deit arguidu hosi lezada nia kotuk haku'ak metin lezada, hafoin arguidu uza nia kamiza hodi kesi metin lezada nia ibun hodi halo relasaun seksuál ho lezada to'o lezada dezmaia. Lezada deklarata liután katak perdua ona arguidu, maibe ba hahalok arguidu nian husu ba tribunál atu kondena arguidu ho pena prizaun, ho razaun lezada lakon eskolah ho idade ki'ik tenke isin rua no haree nia oan mesak.

### **Alegasaun finál**

Prokuradora konsidera arguidu provadu komete krime violasaun seksuál hasoru lezada, mezmú arguidu koko atu nega faktu balun, maibe lezada konfirma faktu hotu iha akuzasaun no deklarasaun lezada nian ne'ebé perdua ona arguidu, maibe ba hahalok arguidu nian husu ba tribunál atu kondena arguidu, lezada ho idade tinan 16 tenke lakon eskolah, tanba isin rua no tenke haree mesak nia oan, nune'e husu ba tribunál atu kondena arguidu tuir moldura pena iha artigu 172 KP.

Entretantu defeza husu ba tribunál atu kondena arguidu tuir konviksaun tribunál nian, haree ba arguidu ho lezada iha relasaun namora, sira halo relasaun seksuál tanba hakarak no hakarak, kona-ba lezada nia liafuan husu ba tribunál atu kondena arguidu, ne'e tanba lezada hakarak duni arguidu tama prizaun.

### **Desizaun**

Depoizde avalia faktu sira ne'ebé prodús iha julgamentu, tribunál prova katak lezada fila hosi eskolah atu ba uma iha dalan klaran arguidu mosu hosi kotuk haku'ak metin tiha lezada, hafoin arguidu uza nia kamiza hodi kesi metin lezada nia ibun no rasta lezada tama ba ai-laran fuik ida, bainhira tama ba iha ai-laran fuik ne'e arguidu komesa kolu

lezada nia roupa no latan lezada ba rai no arguidu mós hasai nia roupa hodi halo relasaun seksuál ho lezada no rezulta lezada to’o desmaia.

Tribunál mós prova katak akontesimentu ne’e lezada halo ona tinan 19 bazeia ba lezada nia sertidaun batizmu.

Bazeia ba faktu provadu sira ne’e no tetu mós ho sirkunstánsia agravante no atenuante sira ne’ebé haleu krime ne’e, nune’e tribunál konklui prosesu ne’e no kondena arguidu ho pena prizaun tinan ualu no selu mós indemnizasaun sivíl ba lezada ho montante osan US\$250.00.

## 6. Krime violasaun seksuál ho natureza Inestu

Nú. Prosesu : 0006/22. DIATR  
Kompozisaun Tribunál : Kolektivu  
Juis : Dr. Afonso Carmona, Dra. Maria Solana no Dra. Albertina Neves  
Prokuradór : Dr. Napolião Soares da Silva  
Defeza : Dr. Juvinal Yanes Freitas  
Desizaun : Pena prizaun tinan 9

Iha 10 Maiu 2024, Tribunál Judisiál Primeira Instánsia Dili prezide leitura akordaun ba krime violasaun seksuál ne’ebé envolve arguidu JR hasoru lezada nia oan fetu ho idade tinan 16, iha Munisípiu Ermera.

### Akuzasaun Prokuradór

Prokuradór akuza katak iha 3 Marsu 2022, iha oras tuku 3:00 madrugada, lezada toba dukur arguidu tama tan lezada iha kuartu laran arguidu hasai lezada nia roupa hodi buti lezada nia susun rua no loke lezada nia orgaun sensitivu hafoin halo relasaun seksuál ho lezada to’o ezakula no arguidu ameasa lezada atu labele fó hatene ba lezada nia inan no lezada nia avo fetu se la’e arguidu sei sona mate lezada. Tanba sente ta’uk ho liafaun ameasa hosi arguidu halo lezada mós nonok de’it.

Tuir mai iha 2 Abril 2022, iha oras tuku 4:00 madrugada, lezada toba dukur hela iha kuartu laran, arguidu tama ba iha lezada nia kuartu laran lori liman basa dala ida iha lezada nia kidun halo lezada hakfodak no hader nune’e arguidu nia ferik oan segundu haree no hase kedas arguidu no dehan ba arguidu *“nusa mak ó tama fali labarik nia kuartu laran ó halo saida iha ne’e”*.

Tanba sente truma no ta’uk lezada fila hosi eskolah ba kedas nia inan rasik nia uma hodi konta tuir saida mak akontese, arguidu ba buka lezada atu haruka fila fali ba uma maibé lezada lakohi nune’e lezada ho nia inan ba hato’o keixa iha polísia.

Prokuradór akuza arguidu kontra artigu 172 KP kona-ba violasaun seksuál ho moldura penal 5 to’o tinan 15.

### **Produsaun ba prova sira**

Iha prosesu julgamentu, arguidu konfesa parsialmente ba faktu sira iha akuzasaun no deklarata katak arguidu la halo relasaun seksuál ho lezada. Tanba iha data akontesimentu ne'e arguidu iha hela Dili, no iha data akontesimentu sigundu iha 2 Abril 2022, ne'e loos duni arguidu baku lezada nia kidun halo lezada hakfodak hodi hader, tanba arguidu atu foti deit kadernu ne'ebé lezada toba hanehan hela iha hirus matan tan lezada toba taka rabat. Arguidu mós dehan iha sira nia uma ne'e lezada la'os mesak iha uma, maibé sira seluk iha uma laran mós barak. Arguidu deklarata liután katak arguidu ho lezada nia inan rasik divorsiu iha tinan 2017, lezada hela ho nia inan rasik. Bainhira iha problema ema bok lezada mak lezada ba hela fali ho arguidu nu'udar lezada nia aman rasik, lezada hela hamutuk ho arguidu lezada foin eskola pre sekundária klas 1 atu ba klas 2. Lezada halai ba hela hamutuk ho nia inan rasik tanba arguidu mak hirus lezada.

Entretantu, lezada kontinua konfirma faktu sira iha akuzasaun no deklarata katak lezada ho nia alin toba hamutuk iha kuartu laran, arguidu tama ba kuartu laran hasai hotu lezada nia rounpa halo lezada hakfodak, arguidu kaer lezada nia susun no orgaun sensitivu hodi halo relasaun seksuál ho lezada to'o ezakula. Depoizde akontesimentu ne'e ho tristi lezada mesak foti fali nia rounpa hatais, lezada iha hanoin atu kesar ba nia avo-feto maibé arguidu foti tudik ne'ebé rai hela iha kuartu laran, arguidu uja hodi ameasa lezada, maibé bainhira fila hosi eskolah lezada ba kedas nia inan rasik hodi informa kedas kontesimentu ne'e no sir aba hato'o kedas keixa iha polísia.

Testemuña ZA hanesan lezada nia inan rasik depoimenta katak, arguidu ho lezada ho testemuña husik malu desde tinan 2017 no lezada ba hela ho arguidu, testemuña mós la hatene kona-ba faktu akontesimentu ne'e, maibé nia rona deit istoria hosi lezada mak hatete katak nia aman rasik viola ona nia. Lezada fila hosi eskolah mai kedas iha uma, no nia lakoi fila tan ba nia aman nia uma.

### **Alegasaun finál**

Prokuradór konsidera arguidu provadu komete krime violasaun seksuál hasoru lezada tuir konfisaun parsial hosi arguidu, konfirmasaun hosi lezada ba faktu sira iha akuzasaun no depoimenta hosi testemuña ZA hanesan lezada nia inan ne'ebé hatete katak lezada fila hosi eskola ba tan testemuña iha uma hodi konta faktu hosi akontesimentu ne'e, bainhira arguidu atu bolu lezada fila fali ba nia uma maibé lezada lakoi fila on aba hela ho arguidu. Nune'e husu ba tribunál atu kondena arguidu ho pena prizaun bazeia ba artigu 172 KP.

Entretantu, defeza husu ba tribunál atu kondena arguidu tuir konviksaun tribunál nian, mezmu arguidu deklarata katak la komete aktu ne'e hasoru lezada, maibé lezada konfirma faktu hotu iha akuzasaun.

### **Desizaun**

Depoisde avalia faktu sira hotu, tribunál prova katak iha 3 Marsu 2022, iha oras tuku 3:00 madrugada, lezada toba dukur arguidu tama tan lezada iha kuartu laran arguidu hasai lezada nia roupa hodi buti lezada nia susun rua no loke lezada nia orgaun sensitivu hafoin halo relasaun seksuál ho lezada to'o ezakula no arguidu ameasa lezada atu labele fó hatene ba lezada nia inan no lezada nia avo feto se la'e arguidu sei sona mate lezada, tribunál prova mós katak iha 2 Abril 2022, iha oras tuku 4:00 madrugada, lezada toba dukur hela iha kuartu laran, arguidu tama ba iha lezada nia kuartu laran lori liman basa dala ida iha lezada nia kidun halo lezada hakfodak no hader.

Bazeia ba faktu provadu sira ne'e no tetu mós ho sirkunstánsia agravante no atenuante sira ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun tinan sia.

## **7. Krime aktu seksuál ho adolexente**

Nú. Prosesu	: 0270/23. PCCIC
Kompozisaun Tribunál	: Singulár
Juis	: Dr. Afonso Carmona
Prokuradór	: Dr. Reinato Bere Nahak
Defeza	: Dr. Juvinal Yanes Freitas
Desizaun	: Pena prizaun tinan 1 suspende ba tinan 2

Iha 8 Maiu 2024, Tribunál Judisiál Primeira Instánsia Dili prezide leitura sentensa ba krime aktu seksuál ho adolexente ne'ebé envolve arguidu EA hasoru lezada ho idade tinan 15, iha Munisípiu Dili.

### **Akuzasaun Prokuradór**

Prokuradór akuza katak iha data ne'ebé la apura maibé iha tinan 2023, iha oras tuku 9:00 dadeer, lezada hasoru malu ho arguidu iha Sr. D nia uma, iha hasoru malu ne'e arguidu husu ba lezada atu hasai lezada nia roupa laran no arguidu mós hasai arguidu nia kalsa hafoin sira halo relasaun seksuál. Iha momentu ne'eba arguidu ho lezada konsege halo duni relasaun seksuál to'o dala lima.

Prokuradór akuza arguidu kontra artigu 178 KP kona-ba aktu seksuál ho adolexente ho moldura penál to'o tinan 5.

### **Produsaun ba prova sira**

Iha prosesu julgamentu, arguidu konfesa integralmente, arrepende ninia hahalok, depois akontesimentu ne'e arguidu ho lezada mós hola malu to'o agora, tanba lezada nia idade sei ki'ik arguidu haruka lezada atu kontinua eskolah. Arguidu rekoñese hahalok ne la di'ak arguidu nu'udar dilikuyente primariu mezmú arguidu hola malu ona ho lezada no seidak iha oan, ho nune'e arguidu nafatin haruka lezada kontinua ba eskolah. Arguidu mós rekuñese lezada foin permeiravés toba ho arguidu.

Alende ne'e, lezada kontinua konfirma faktu sira iha akuzasaun no konfirma mós ho arguidu nia deklarasaun, depois akontesimentu ne'e sira nain rua hola malu, no lezada kontinua eskolah. Foin mak permeiravés halo relasaun seksuál ho arguidu, no relasaun seksuál ne'ebé sira halo ne'e tanba hakarak ho hakarak.

### **Alegasaun finál**

Prokuradór konsidera arguidu provadu komete krime aktu seksuál ho adolexente hasoru lezada tuir konfisaun integralmente hosi arguidu, konfirmasaun hosi lezada ba faktu sira iha akuzasaun no deklarasaun hosi lezada ne'ebé sira hola malu ona hanesan feen ho la'en. Mezmu nune'e haree ba lezada nia tinan foin mak 14 fulan 9, foin permeiravés halo relasaun seksuál ho arguidu, nune'e husu ba tribunál atu kondena arguidu ho pena prizaun tinan rua suspende ba tinan tolu.

Entretantu, defeza husu atu kondena arguidu tuir konviksaun tribunál nia, haree ba arguidu konfesa, arrepende ninia hahalok ne'ebé nia halo, arguidu ho lezada mós hola malu ona hanesan feen ho la'en no arguidu kontinua haruka lezada ba eskola.

### **Desizaun**

Depoisde avalia faktu sira ne'ebé prodús iha julgamentu, tribunál prova katak, arguidu halo relasaun seksuál ho lezada, lezada foin halo tinan 14 fulan 9, arguidu hatene lezada nia idade sei ki'ik, depoisde akontesimentu ne'e sira hola malu no lezada kontinua eskola.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa ba faktu, arrepende ninia hahalok, foin permeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan tolu suspende ba tinan tolu no selu mós indemnizasaun sivíl ba lezada ho montante US\$1,500.

## **8. Kazu sivíl regulasaun ba ezersísiu podér paternál**

Nú. Prosesu	: 0042/19 CVTDS
Kompozisaun Tribunál	: Singulár
Juis	: Dr. António José Fonseca Monteiro de Jesus.
Prokuradór	: Ivonia Maria Guterres
Defeza	: Joana Cristina Pinto.
Desizaun	: Omologa pedidui dezisténsia keixa

Iha 7 Maiu 2024, Tribunál Judisiál Primeira Instánsia Dili prezide julgamentu tentativa konsiliaun kona-ba regulasaun ezersísiu podér paternál ho forma espeisial ne'ebé envolve menór nain tolu ESdS, OFSdS no JSdS, hasoru rekeridu LPdS no rekerida NFS, iha Munisípiu Dili.

### **Termu no fundamentu sira**

Rekerida no rekeridu moris hamutuk hanesan feen la'en, iha tinan 2000 to tinan 2020 rekeridu sira moris hamutuk hanesan feen ho la'en.

Iha 22 Outubru 2021, rekeridu duni sai rekerida ho sira nia oan sai hosi uma rekerida ho menór sira sai hosi uma ba toba iha lian na'in nia uma atu nune'e bele rezolve tiha sira nia problema, nune'e lia na'in ho familia sira kontaktu malu hodi tuur hamutuk decide iha 16 Juñu 2023, rekeridu ho rekerida hamutuk ho lia na'in sira atu rezolve problema, rekeridu ba uluk lia na'in nia uma hodi informa ba lia na'in, rekeridu lakohi ona moris hamutuk ho rekerida. Durante tinan tolu ona rekeridu husik hela menór sira hela mesak ho rekerida. Rekeridu hanesan membru F-FDTL, kada fulan salariu US\$700.00 ne'ebé iha kondisaun sufisiénte tebes atu fó alimentasaun ba menór sira. Nune'e rekerida inan hatama asaun petisaun ida ne'e atu husu ba rekeridu atu fó alimentasaun ba menór nain tolu, ne'ebé rekeridu durante ne'e abandona no la fó alimentasaun ba menór na'in tolu.

Kazu ne'e relasiona ho ezersísiu podér paternál tuir artigu 757, 758 (1), 759, 762, 1765, 1786, 1787(2), 1782, 1804 no 1805 KS.

### **Tentativa konsiliaun**

Tentativa konsiliaun ne'e rekeridu no rikerida konkorda menór nain tolu ne'e nafatin hela ho rekerida, kona-ba visita agora dadaun menór nain tolu eskola hela nune'e iha tenpu feriadu rekeridu bele ba lori menór nain tolu ne'e ba halimar iha nia uma, menor nain tolu, rekeridu mós bele ba lori menór nain tolu hodi selebra rekeridu nia aniversariu no loron bo'ot no mós rekeridu bele ba lori menór nain tolu ba iha ninia uma hodi selebra loron bo'ot sira, importante mak iha komunikasaun entre rekeridu inan ho rekeridu aman.

Rekeridu hanesan meebru F-FDTL prontu sei fó alimentasaun kada fulan ida US\$150.00 ba nia oan nain tolu, rekeridu sei komesa transfer osan ba menór ne'e ba menór sira nia rekening komesa 25 to'o 30 Juñu 2024.

### **Alegasaun finál**

Prokuradór reprezenta menór no defeza husu ba tribunál atu omologa akordu ne'ebé rekeridu no rekerida konkorda hamutuk ona atu tau-matan ba menór sira.

### **Desizaun**

Bazeia ba parte rua nia akordu kona-ba alimentasaun, hela fatin no rejime visita nian, tribunál konklui prosesu ne'e no omologa akordu dame ne'e.

### **Atu hetan informasaun liutan favór kontaktu:**

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: [ana@jsmp.tl](mailto:ana@jsmp.tl)

[info@jsmp.tl](mailto:info@jsmp.tl)

Website: <http://jsmp.tl>